



Sabtu, 18 September 2021
Ogen: Yakobus 3:17-18



Benih Perdamaian



Dame eme sada perayaken geluh. Erbage-bage usaha sinilakoken segelah ngeluh dame. Lit deba gawah-gawah, nadingken rutinitas si teptep wari, lit rende mpesenangkan diri, lit ka deba erpengakap maka adi enggo melala erta maka nggeluh dame, lit ka adi enggo seh sekolah anak janah erdahin kerina maka dame ras sidebanna. Kenca si dat entah silakoken sie kerina, payo nge dame geluhta. "Bagi natap delleng" nina rusur teman-teman, si tatap dauh-dauh nari melikas kal tapi kenca kita bengket ku bas seh serbutna.

John F. Kenedy pernah ngatakan maka *"perdamaian adalah proses harian, mingguan, bulanan yang berangsur-angsur mengubah opini, perlahan-lahan mengikis hambatan dan diam-diam membangun struktur baru."* Ngatakenca maka perdamen e jadi erkiteken sada proses. Labo terjadi bage-bage sada, tapi lit waktu siniperluken. I bas proses kita perlu erlajar dengen tetap setia maba perdamen sabap arah kai silakoken kita i bas maba dame enda mereken ngaruh si cukup mbelin e me ngurangi ambaten-ambaten entah pe tantangan si lit janah mbagun sada struktur si mbaru.

I bas surat Jakup mpersingeti maka benih perdamen e arus isuanken i bas kegeluhen. Benih eme Kata Dibata, isuanken i bas pusuh si bersih, ngit erdame, lemah lembut, la megogo, dem perkuah, perbahanen si mehuli, la rayo-ayo dengen tangkas kata tangkas ukur. Enda me ikataken kepentaren si rehna i bas Dibata nari. Si pindo gegeh Kesah Si Badia mpeturah benih perdamen e gelah e enggo jadi si kerajangenta, enggo ersada ras kulanta. I ja kita i je lit perdamen. Bagi biji sinuan-sinuan si isuanken dengen si pekena-kena teptep wari, banci mereken buah si mehuli. Mari dage tep-tep warina si suanken benih perdamen e, seh maka perubahren i bas kegeluhen jabu ras sekelewetta pe jadi, dame sekerajangenta.